



Den Open di Mexico Internacional

Monica Pimentel a konkista medaya di brons

ORANJESTAD/AGUASCALIENTES - Diadomin- go e atleta femenino, Monica Pimentel a sigui den e pasonan di Smit, unda e tambe a logra konkista un di tres luga y un medaya di brons pa Aruba.

E atleta Pimentel mescos cu Smit tin mas cu un luna den un campo di entrenamiento na Mexico unda e ta entrenando bou guia di e ex coach

di e seleccion di taekwondo di Aruba, Sr. Julio Ramos.

E atleta di taekwondo Monica Pimentel pa varios aña a residencia na Hulanda y a bringa den varios competencia internacional na Europa y tambe den e continente America, semper representando Aruba.

Den e Open Internacional di Taekwondo di Mexico na Aguascalientes, unda mas di

200 competido di 30 pais di henter continente di America a topa otro, Pimentel a bringa den e categoria di -53 kilo y a enfrenta e miho nan di henter e continente den su categoria.

Bringando 6 pelea en total tanto den e Pan Americano y e Open di Mexico, Pimentel a logra su prome medaya grandi pa Aruba.

Comision di Subsidio hunto



cu financiamento di Fundacion Lotto pa Deporte ta kere fielmente den e desaroyo di nos hoben atletanan. P'esey mes ta apoya y sostiene atle-

tanan elite manera Monica Pimentel pa por competi den torneonan grandi caminda e miho nan di mundo ta topa otro. □

Stuart Smit a logra medaya di brons den taekwondo

ORANJESTAD/AGUASCALIENTES - Un biaha mas e atleta di taekwondo Stuart Smit a cosecha exito pa Aruba durante di un competencia den exterior.

Den e Campeonato Pan Americano y el Open Internacional di Taekwondo di Mexico na Aguascalientes e hoben Arubiano Smit a logra di tres luga bon pa un medaya di brons. Mas di 200 competido di 30 pais di henter e continente America a yega Mexico pa asina enfrenta otro den e competencia aki.

E Campeonato Pan Americano de Taekwondo conoci como e G4, a wordo teni den e Gimnasio Olimpico del Instituto del Deporte del Estado de Aguascalientes.

E atleta Smit a bringa den e categoria di -87 kilo y a enfrenta e miho atletanan di henter e continente den su categoria. Actualmente e



atleta Arubano tin mas cu un luna hibando un preparacion intensivo bou guia di e ex coach di e seleccion di taekwondo di Aruba, Sr. Julio Ramos. Esaki ta e di dos medaya di brons pa Smit pa loke ta un campeonato di taekwondo den 2014. Na luna di maart Smit ya a logra un medaya di brons pa Aruba den e Weganan Odesur na

Santiago de Chile. E deporte di taekwondo ta sigui destaca y ta sacando cara di Aruba den varios competencia internacional logrando medaya, principalmente e atleta elite Smit.

Comision di Subsidio cu financiamento di Fundacion Lotto pa Deporte ta kere fielmente den e desaroyo di

nos hoben atletanan. P'esey mes ta sostiene atletanan elite manera Stuart Smit pa competi den torneonan grandi caminda e miho nan di mundo ta topa otro. Triunfo pa Aruba ta un estimulo pa otronan cu un dia tambe kier logra lo maximo den deporte. □

